

quid Troes potuere, quibus tot funera passis  
 cunctus ob Italiam terrarum clauditur orbis?  
 certe hinc Romanos olim volventibus annis,  
 hinc fore ductores, revocato a sanguine Teucris, 235  
 qui mare, qui terras omnis ditione tenerent,  
 pollicitus. quae te, genitor, sententia vertit?  
 hoc equidem occasum Troiae tristisque ruinas  
 solabar fatis contraria fata rependens;  
 nunc eadem fortuna viros tot casibus actos 240  
 insequitur. quem das finem, rex magne, laborum?  
 Antenor potuit mediis elapsus Achivis  
 Illyricos penetrare sinus atque intima tutus  
 regna Liburnorum et fontem superare Timavi,  
 unde per ora novem vasto cum murmure montis 245  
 it mare proruptum et pelago premit arva sonanti.  
 hic tamen ille urbem Patavi sedesque locavit  
 Teucrorum et genti nomen dedit armaque fixit  
 Troia, nunc placida compostus pace quiescit:  
 nos, tua progenies, caeli quibus adnuis arcem, 250  
 navibus (infandum!) amissis unius ob iram  
 prodimur atque Italis longe disiungimur oris.  
 hic pietatis honos? sic nos in scepra reponis?'

Olli subridens hominum sator atque deorum  
 vultu, quo caelum tempestatesque serenat, 255  
 oscula libavit natae, dehinc talia fatur:  
 'parce metu, Cytherea, manent immota tuorum  
 fata tibi; cernes urbem et promissa Lavini  
 moenia sublimemque feres ad sidera caeli  
 magnanimum Aenean; neque me sententia vertit. 260  
 hic tibi (fabor enim, quando haec te cura remordet,  
 longius, et volvens fatorum arcana movebo)

232-234 *FMR*; 235-260 *FMRV*; 261, 262 *FMR* 236 omnis *F*<sup>1</sup>  
*agnoscit Serv.*: omnes *F*<sup>2</sup>*V*: omni *Mγbc Serv.* editores plerique 237  
 pollicitu's: *Ribbeck* 246 proruptum *F*<sup>2</sup> (*ut videtur*) *MRV*<sup>1</sup> *Serv.*:  
 praeruptum *F*<sup>1</sup> (*ut videtur*) *V*<sup>2</sup>*γ*<sup>1</sup> *agnoscit Serv.*